

4  
DISCOVERS  
VERITABLE DES  
GVERRES ET TROV-  
bles aduenus au pays  
de Prouence.

*Enuoyé à monsieur le Comte de Tande,  
Lieutenant pour le Roy  
en Prouence.*

Par N. R. P.

M. D. LXIIII.

A MONSIEUR LE  
COMTE DE TANDE, CHEVA-  
lier de l'ordre, & Lieutenant pour le Roy  
en ses Pays de Prouence, N. R. son tres-  
humble seruiteur, Salut.

**M**onsieur, pource que i'ay eu tous-  
iours la posterité en recommandation,  
autāt qu'homme qui viue pour le iourd'huy,  
tout ainsi que ie desire d'estre recommandé à  
la posterité : i'ay mis peine de recueillir ce pe-  
tit Discours des guerres de Prouēce, le mieux  
qu'il m'a esté possible, partie selon ce que i'en  
ay veu de mes yeux, & partie selō ce que i'en  
ay peu auoir & entendre des autres. Or sa-  
chant que telle œuvre seroit agreable à vos  
Seigneuries, comme venant de vous & des  
vostres, qui auez porté tout le principal faix  
de ces guerres, tout ainsi que de vostre sang,  
mesmes d'autres, se sont efforcez de nous  
abbatre & ruiner de tout en tout, selon qu'il  
a plu à Dieu de disposer les cœurs des per-  
sonnes, & se iouër des poures humains ici  
bas. Pour ces causes, Monsieur, & autres  
qu'il n'est besoin d'exposer maintenant, i'ay  
eu volonté, & prins cœur en escriuant ce pe-

tit ouurage, eſperant qu'il vous ſeroit dedié,  
voué ou conſacré, comme diſent nos Poëtes,  
me conſiant que telle œuvre ne ſera impor-  
tune ou mal plaiſante à vous, ou aux vo-  
ſtres: meſmes qu'elle parle à la verité de vos  
affaires de Prouence, & le plus ſuccincte-  
ment qu'il a eſté poſſible. Et m'aſſeure que  
tel lira ce petit Diſcours, qui en fera quelque  
iour ſon profit, voyant tant de gens de bien,  
& iſſus de ſang noble & genereux, tant de  
bons gentilshommes de noſtre pays de Pro-  
uence, tant de bonnes dames & damoiſelles,  
qui eſtoient à la ſuite du camp de Ciſleron,  
& tant d'autres ſimples femmelettes, auoir  
ſouſtenu par tant de troubles & orages, par  
tant de gouffres & dangers de ceſte mer pe-  
rilleuſe, le parti de Chriſt & de ſon Euāgile.  
Parquoy, Monsieur, il vous plaira prendre  
mon labeur à gré, & l'offre qui vous eſt fai-  
te d'un de vos ſeruiteurs, lequel tant que l'a-  
me luy baſtera dās le corps, priera pour vous  
& pour la conſeruation de vos biens, titres  
& ſeigneuries. De Lyon ce xx. de Mars,

**DISCOVRS VERITABLE**  
*des guerres & troubles aduenus au pays*  
*de Prouence, en l'an M. D. LXII.*



**M**ONSEIGNEVR, afin que les guerres de nostre pays de Prouëce, qui ont commençé enuiron le mois de Septembre passé, ne soyent mises en oubli: pource qu'il est bien necessaire qu'vn chacun sache le discours des affaires de son temps, & mesmement de son pays: ie me suis deliberé de discourir ici en peu de paroles, comment les choses se sont portees de pardela, du temps de la sedition de quelques vns du pays. Car il est à noter, que par l'orgueil & arrogance d'vn simple gentilhomme appellé Flaccéan, tout le malheur vint en Prouence, touchant les guerres passées. Car estât deputé Gouverneur de la ville d'Aix, par l'instigation & mauuais conseil, comme i'estime, de quelques vns des plus vieux du Parlement, il se mit à leuer les cornes si haut, que sans la bonté & diuine prouidëce de Dieu, les choses eussent mal basté pour les fideles. Car ils auoyent conspiré la mort de cinq cës, voire de mille fideles, qui estoient dedans la ville d'Aix, ou aux enuiron. Mais Dieu qui fait toutes les entrepri-

ses & menees secrettes des meschans, & est  
toufiours & sera pour defense aux siens, les  
a empeschez de faire tout ce qu'ils auoyent  
proienté. Donques le conseil estoit prins par  
ces malheureux, de resister de toutes leurs  
forces à l'Edict & Ordonnance du Roy, sur  
la conseruation des vns & des autres du  
royaume de France. Le Roy pardonnoit à  
ses suiets toutes fautes commises pour le  
faict de la Religion. Et depuis, les choses  
ayant cheminé de mieux en mieux, par la  
continuelle remonstrance des Eglises, & les  
temples estre ottroyez du consentement du  
Roy, & la Roynes mere, & le Roy de Na-  
uarre, & autres du sang royal & du Conseil:  
cela esmeut encore dauantage le cœur des  
malins à resister & cōtreuenir à l'ordonnan-  
ce du Roy, estimans que c'estoit vne ordon-  
nance d'hōme priué, qui n'auoit pas autho-  
rité d'establir telles choses: tant est la parole  
de Dieu fascheuse aux malins & reprouuez.

Parquoy les Messieurs de la ville & du  
Conseil d'Aix (gens escorts & sages au faict  
du monde, & qui sont comme Rois en leur  
pays de Prouencé) tindrent conseil avec les  
Consuls & Gouverneur de la ville, pour em-  
pescher le cours de toutes ces choses, bien  
qu'elles fussent ordonnees du Roy. Et quoy  
qu'ils fussent aduertis de la deliberation des

Princes, & des ordonnances publiques: quoy qu'ils eussent tous les iours nouuelles de la Cour, de la publication des temples: ils ne laisserent pas pourtant de persecuter & molester les gēs de bien en toutes sortes, & faire leur cōplot avec leurs voisins, ceux d'Auignon, qui de tout temps ont esté grands persecuteurs de l'Eglise de Dieu: de telle maniere qu'ils auoyēt deliberé les vns & les autres, de dresser de grosses embusches, & s'opposer au vouloir du Roy & de la Cour.

le say qu'un President de la ville d'Aix, que ie ne nommeray point, complotoit tout ceci avec le Vicelegat d'Auignon, mesmes qu'ils auoyent deliberé de faire vn nouveau regne pour le Pape, & fermer les portes à Iesus Christ. Ce qui leur estoit aisé à faire, si Dieu n'eust percé l'oreille & le cœur de ses fideles seruiteurs, pour entendre & se donner garde de toutes choses. Mais tout ainsi que l'assemblee des meschās trauailloit iour & nuict pour se fortifier, & pour donner fin à leurs meschantes entreprises: ainsi du costé des fideles y eut si bon ordre, que les choses estans descouuertes du costé des autres, les fideles de Prouence (ce peu qui y estoit) s'assemblerent à Riez, pour prendre conseil, & aduiser à ce qui seroit necessaire pour la cōseruation de l'Eglise de Dieu. Ce

qui altera tellemēt messieurs les Consuls & le Gouverneur de la ville d'Aix, que peu s'en faut qu'ils ne fussent desesperez : car ils entendirent qu'il se faisoit gros amas de fideles, & que beaucoup de gentilshommes du pays de Prouence, & mesmes monsieur de Varages, homme bien entēdu au faict de la Religion, s'estoit voulu trouuer là, pour deliberer de ces choses, à la conseruation de l'Eglise. Tout ce qui fut deliberé d'un costé & d'autre, c'est assauoir, du costé des Cōsuls & Gouverneur de la ville d'Aix, & du costé des fideles, ne fut autre, sinon que les vns se deliberoyēt d'empescher le cours de l'Euan-gile, & les autres la vouloyēt maintenir par licēce de leur Roy. Cōme ces choses estoyēt ainsi demenees au pays de Prouence, vint monsieur de Crussol, avec cōmission de faire prescher, & ottroyer temples aux fideles, ensemble deux Conseillers deputez pour le mesme faict avec ledit seigneur de Crussol.

Ce qu'ayāt entēdu ceux de la ville d'Aix, ils furent plus fort animez contre l'ordon-nance du Roy, & contre la commission du seigneur deputé : tellement qu'ils firent as-sembler toutes les communes de Prouence, & mirer garnison dans la ville d'Aix, ayans deliberé d'empescher de toute leur force ceste commission. Les cōmunes s'assemble-

rent à Aix, enuiron la fin de Nouembre, vn ou deux de chasque commune: & là fut deliberé de mettre garnison par toutes les villes, & de maintenir iusques à la mort la Loy du Pape, & changer de Roy plustost que de Loy. En signe de quoy, ils se mirent vn petit cordeau au col, enfilé de patenostres, & n'estoit si petit cōpagnon de Pape, qui ne voulust bien auoir ce signe pēdu à son col. Voila ce qui accourageoit & animoit fort le peuple à se bander de leur costé: tellement que les pources fideles trembloient dans Aix, & plusieurs furent contraints de s'enfuir. Je say qu'ils prindrent de ce temps vne ieune damoiselle à Aix, & la battirent de telle sorte, que c'estoit grande cōpassion, pource qu'elle chantoit les Pseaumes. Ils iettoient des pierres aux fenestres des fideles: ils rompoient leurs portes, & les tenoyent comme prisonniers dans la ville, sans qu'ils peussent entrer ou sortir, tellement qu'ils esperoyent de iour en iour qu'on leur coupast la gorge à tous: ce qui ne fut pas, comme vous entendrez ci apres. Monsieur de Crussol estant arriué à Villeneuve d'Auignon, il donna permission de prescher, & mesmes ils firent venir monsieur Viret, pour redresser là vne Eglise. Et de là il s'en vint trouuer monsieur le Comte de Tande à Ma-



rigane , esperant executer en brief sa commission au pays de Prouence. Toutesfois pource que le Gouverneur ne faisoit point de semblant d'obeir, quoy qu'il fust aduerti par le Comte de Tande de se deporter de ces choses, & par son frere mōsieur de Carcès: il fut premierement déclaré rebelle, par lesdits cōmissaires. Mais pour cela il ne desista point , estimant leur commission estre fausse, ou bien d'un ieune Roy , qui n'auoit pas puissance de leur commander, mesmes en ce qui touchoit leur cōscience. Parquoy il estoit tousiours plus enflâbé, & ne laissoit de brauer par la ville d'Aix avec ses compagnons, qui estoient gens seditieux, yrongues, paillars, mutins, & du tout desesperes, qui n'attēdoient rien que le pillage des pures fideles , avec ce q̄ les Chanoines d'Aix leur fournissoient force munition pour armer leurs celiers & leur cuisine: car sans cela ie croy que leur courage n'eust esté tel, avec ce qu'il estoit entre de vieux renards de ce Parlement qui luy souffloyent à l'oreille. Cependant les fideles du pays se rallierent avec le Seigneur de Crussol , & avec le Seigneur Comte de Tande , pour estre à leur garde: & ayant rassemblé leurs forces , ils mirent gens en campagne , avec quelques pieces d'artillerie, qu'on auoit deliberé de

mener deuant la ville d'Aix pour rompre les murailles. Ce qui effraya tellement ceux de la ville, qu'ils delibererent plustost de se rendre que de tomber en telle extremite, tellement qu'ils donnerent ordre de mettre hors de là le chef de la sedition, pour n'auoir la flanquade. Donc le Gouverneur sortit des portes d'Aix, donnant à entendre qu'il alloit pardeuers le Seigneur de Crussol: toutesfois i'enten qu'il gagna le haut, & se sauua à Brignole. Cepédant monsieur de Crussol fit marcher la compagnie des soldats à Aix, où ils entrerent l'enseigne desployee, au grand regret des malins, & contentement de tous les fideles. Et le lendemain permit de prescher dans la ville, où assista gros nombre de fideles, force Gentils-hommes, & mesmes le fils de monsieur le Comte, & son beau-fils: & y furent faites baptizailles & autres solennitez à la façon commune de l'Eglise, sans que personne osast bouger: & à l'instant mesme marcha contre le Gouverneur, la compagnie de monsieur de Mauuás & quelques autres. Mais le pailard auoit si bien mené son affaire, qu'il eut incontinent tous ses compagnons qui se rallierent à luy, & commencerent à se fortifier à Brignole, tellemēt qu'il se trouua bien tost accompagné de cinq à six cés hommes tous

sedition, brigans & voleurs, qui commencerent à l'instant, de voler, robber, saccager les maisons des fideles de Brignole, & des villages d'alentour : de violer filles, battre, tuer, & faire choses execrables, comme tels sont coustumiers de faire. Quelquesfois il estoit à Brignole, autresfois à Hieres, autresfois à Cyne, & quelquesfois à Bariaux : où il y fut assiegé des compagnies que monsieur de Crussol auoit fait marcher en Prouence. Et fut faite l'escarmouche, qui dura bien six heures, où il y eut grand nombre de soldats tuez d'un costé & d'autre, & depuis y en a eu d'executez. Toutesfois le chef de ceste sedition eschappa sans qu'il fust aperceu de personne : & Bariaux fut exposé en la main des nostres.

Après la desfaite de Bariaux, les compagnies Chrestiennes se retirerēt en garnison, partie à Brignole, & partie en la ville d'Hieres. Or quelques iours apres, le seigneur Côte de Tande, Cheualier de l'ordre, & Lieutenant du Roy au pays de Prouence, manda ausdites cōpagnies de se retirer vn chacū en leur maison. Parquoy les Chefs & Capitaines estans cassez, soudain cōmanderent de ployer les enseignes. Toutesfois le Capitaine Espinoze aduerti de se retirer, fut admo-

nesté de plusieurs, & mesme du Capitaine Tholon, Sergét maior desdites compagnies, de tenir son enseigne droite. Et ce pour bonnes fins. Car ils s'estoyent apperceus du cōplot & machination des malins & infideles dudit pays. Et à la verité ce fut vn bon aduertissement pour les fideles. Car deux ou trois iours durant, sous ceste enseigne marcherent environ cinq cens hommes : lesquels se fussent desbandez, en danger de estre trouffez. Cependant le Comte aduerti de l'entreprise & machination des malins, manda commissaires de nouveau pour redresser les compagnies : lesquelles estre arriuees à la ville de Quinson, & de Peimouisson, redresserent quelques enseignes qui se renforçoient tous les iours. Et de là prindrent le chemin de Pertuis, où ils mirent le siege. Or la troupe des fideles s'augmentoit de iour en iour, tellement qu'ils estoient bien quinze cens hommes autour de Pertuis : & les pources fideles bannis & chasséz de leurs maisons, femmes & enfans, eurent loisir de se rallier & se rassembler durant le camp. Toutesfois les nostres estans sans artillerie, & n'ayans moyen d'en recouurer, pource que les villes & forteresses ou l'artillerie estoit, tenoyent pour l'ennemi, tascherent par autre moyen d'entrer dans la ville

de Pertuis: car ils firent deux mines. Cependant les malins s'assembloyent de tous les endroits du pays, pour desfaire les nostres, qui faisoient deuoir de se defendre & escarmoucher iour & nuict autour de la Durance, les malins estans de l'autre costé pour passer & venir au secours à Pertuis. Mais voyans les malins que leur pouuoir n'estoit de passer, il fut deliberé par mōsieur de Sōmeriue, fils de Mōsieur le Comte, Gouverneur dudit Camp, qui se banda contre son propre pere, & par monsieur de Carces, de faire marcher le Camp ensemble leur artillerie, au droit de Cauaillō, & là passer ladicte riuiera. Ce qui leur estoit aisé à faire, si le Seigneur par sa bōté ne les eust empeschez. Cependant que les mines se faisoient, voici arriuer vne poste de la part de Monsieur le Comte, qui estoit lors à Manoesque, pour diuertir les fideles de leur entreprinse, & se donner garde de l'ennemi qui s'approchoit de plus fort en plus fort. Et de faict, ils cōmāderent d'oster la poudre desdites mines, trousser bagage, & prendre le chemin de la Tour d'Aigues, pour aller droit à Manoesque, & de là à Cisteron. Quand Someriue & Carces entendirent cela, ils se delibererent de les suiure avec leur armee, & les aller trouuer à Cisteron. Mais ils furent des-

tournez par vne lettre enuoyee de la part de Fabrice, Gouverneur de l'armee du Pape en la ville d'Auignon, & Comté de Venize, qui les aduertissoit de mener le camp avec l'artillerie, deuers Oranges, ou y auoit grosse troupe d'huguenots rebelles & seditieux. Parquoy Someriuë, desireux d'executer son venim à l'encontre des enfans de Dieu, fit soudain marcher la Cauallerie du costé d'Oranges. Mais les compagnies des fideles d'Orages estoyët sorties quelques iours deuant, pour donner secours au Presidët Parpaille, qui estoit prisonnier à Bourg. De quoy Fabrice aduertit, il auoit donné les aduertissemens que dessus au camp de Someriuë. Le camp de l'ennemi arriuë à Oranges, ne donna pas petite frayeur à si petit nombre de gens qui estoit dans la ville: toutesfois leur recours estoit à prier Dieu. Quand l'ennemi fut arriuë, il fit approcher l'artillerie des murailles, & commença à faire breche. Parquoy ceux de la ville ne pouuäs resister, la quitterent: toutesfois il y resta gräd nombre de morts & de prisonniers, & entre autres, le ieune Capitaine Coste fut prisonnier: & beaucoup des Papistes mesmes qui s'estoyent mis en defense, furent tuez: les femmes & les filles violees. Et non contents de cela, mettent le feu en deux ou trois endroits de la ville, & de gräde rage abbatent

les maisons. Apres la prise d'Oranges, Carces & Someriuue ne faillirent de poursuiure leur entreprise contre les fideles de leur nation. Parquoy incontinent ils se delibererent de prendre le chemin de Cisteron: toutesfois ils entendirent que le Seigneur de Soreze, de Mauuans, du Bar, & autres estoient departis de Cisteron, pour aller au secours du Baron des Adrets à Grenoble. Parquoy ils marchent vers ledit Cisteron. Cependant le peuple de Cabrieres, Merindol, Lauris, & lieux circouoisins, qui estoit chassé de son pays, elut pour Capitaine, vn dit Siguiran, bon soldat & de grand courage, entendant que l'ennemi approchoit: & aduerti par monsieur le Comte, de se retirer vers Cisteron, ne fit faute, apres beaucoup d'escarmouches, de tourner le dos, & aller vers Cisteron avec tout le mesnage: de sorte que quand ils arriuerent à Cisteron, on disoit, Voici le peuple d'Israel. La mere portoit le petit enfant entre ses bras, & les petis enfans de 5. ou 6. ans, estoient contrains de se trainer parmi le bagage, sans souliers, & sans habillemens. On ne oyoit que lamentations parmi ce peuple, pour la faim qui les pressoit: plusieurs estoient tourmentez de fieures. Ce que voyãs les Papistes, les interroguoyent pour-

quoy ils pleuroyēt: mais ils ne sauoyent que dire, sinon qu'ils estoient chassés pour la querelle de Dieu. Parquoy ils furent logez hors la ville en vn couuēt, & on leur apportoit des viures. Cependant la ville doutant le siege, se fortifioit. Sur cela, le Seigneur de Sômeriue enuoya vn Capitaine pour espier les passages par où deuoit passer leur camp. Ledit Capitaine, appelé Bouque-negre, vint à vn petit village, appelé Biquoc, ou il fut surprins, cependant qu'il reposoit en vn logis, par le Capitaine Pelissier, qui estoit sorti peu au parauant, avec vne compagnie de gens de pied, de la ville de Cisteron: & estât venu à Pepin, fut aduerti que ledit Bouque-negre estoit passé accompagné d'une troupe de soldats. Parquoy il s'achemine ou estoit ledit Bouque-negre, & à la conduite d'un payfan qui leur monstra la maison, Pelissier fait environner la maison de soldats, & hurant par deux ou trois fois à la porte, donna telle frayeur à l'ennemi qui estoit assiégué, qu'il fut contraint de se cacher dans de la paille, ou il fut troussé des nostres, & mené à Cisteron avec tous ses gens. L'endemain mercredi 8. de Iuillet, Bouque-negre interrogué des Capitaines de la ville, confesse le tout sans difficulté, se fiant de la bonté des Capitaines qui l'auoyent desia prins à merci  
par



par vne fois, estant au chasteau de Bariaux. Toutesfois les femmes & Damoiselles de la ville de Cisteron, accoururent vers le Seigneur de Beau-ieu, Gouverneur de la ville, le suppliant de faire executer ledit Bouque-negre, comme seditieux & violateur de la chasteté des femmes : de sorte qu'il fut pendu à l'instant, par vn sien seruiteur qui fit office de bourreau contre son propre maistre. Or les nouuelles vindrent au camp de l'ennemi, que Bouque-negre estoit pendu. Parquoy le Seigneur de Somerive enuoye soudain par vne lettre à ceux de Tarascó, qu'ils facent mourir le Capitaine Coste, qui auoit esté mené prisonnier de la ville d'Orange, ce qu'ils firent: car il fut pendu. Cependant l'ennemi est en chemin pour approcher de Cisteron, & Dieu fait de quelles menaces ils chatouilloient les pures fideles. Les vns se promettent de se faire riches: les autres, de forcer force filles, & les autres de se faouler du sang des pures fideles. Parquoy le vendredi 10. Iuillet, ils mettent le siege deuant Cisteron, ou il fut combatu par deux ou trois heures, à l'endroit du pont de Labron: toutesfois voyans les nostres que la retirade estoit longue, & que l'ennemi les chargeoit de si pres, ils se retirent à la ville: toutesfois il y demeura bien trente des no-

stres, ou morts, ou prisonniers, s'estans voulu sauuer par la plaine. Puis le soir que l'artillerie fut arriuee, l'ennemi fit ses approches, & commença la batterie à la diane, du costé de la Durance, en vn coin de la ville, deuers le soleil leuant : tellement que par leur diligence, la breche fut faite enuiron deux heures apres midi, & lors ils mirent leur camp en trois ou quatre bataillōs, pour venir à l'assaut. Ce que voyant le Seigneur de Beau-ieu & autres Capitaines de la ville de Cisteron, ils se mettent au deuoir de se defendre, & auoir fait leurs prieres à Dieu, de les fortifier contre l'ennemi, ils soustien-  
nent le premier assaut, de tel courage, que l'ennemi fut repoussé, & ne reuint à la breche de quinze iours. Le nombre des tuez fut plus grand du costé de l'ennemi, que du nostre : car il ne mourut pas plus de dix ou douze des nostres. Et le Capitaine Coste, pere du ieune Coste, fut blecé à la cuisse, d'vne escaille qui fut portee d'vne canonnade. La nuit venue, les nostres font remparer la breche, attendans de iour en iour nouvelle venue : mais l'ennemi ne bougeoit, sinon qu'on bailloit tousiours quelques alarmes de nuit, & tiroit-on cōtre les maisons. Le samedi venant, 18. de Iuillet, le Seigneur de Soreze & Mauuans, vindrent au secours.

de la ville, & menerent nouuelles forces: ce qui ne donna pas petite assurance aux nostres, qui rendirent graces à Dieu, du secours qui leur estoit enuoyé de nouveau. Or la nuit venue que les soldats de Mauuans se furent vn peu reposez, fut faite vne camifade, qui dura partie de la nuit, ce qui fut cause de faire mettre tout leur camp en armes: toutesfois voyant Someriuë, que l'ennemi estoit fort, il delibera de se retirer avec son armee à l'Escalle, qui est vn pays fort marescageux: & de fait, il enuoya quelques pionniers, pour faire trêchees, & couper le chemin: & cela fait, il fit marcher le camp audit lieu. Parquoy les nostres deliberent de sortir, & dōner à la queue: & entendant le Seigneur de Mauuans, que l'ennemi passoit la riuere, fit reuier bride pour aller passer du costé du pont vers Cisteron: & vint dresser son camp ou estoit l'ennemi, si bien que les sentinelles de tous les deux camps se voyoyent. Deux iours apres, voicy arriuer le Seigneur de Ponart, avec mille ou douze cens hōmes, & trois cens cheuaux ou enuirō: lequel voyant q̄ le cāp estoit parti de Cisteron, marche l'endemain à l'Escalle pour faire escorte aux nostres. Et lors on voulut dōner bataille, sans l'aduis des Gouverneurs de nostre camp, qui craignirent l'artillerie

de l'ennemi. Cependant au camp de l'ennemi arriuerent quelques damoiselles: assa-  
uoir, la damoiselle de Someriuë, de Car-  
ces, de la Verdierë & autres, lesquelles fu-  
rënt recueillies des Capitaines du camp, en  
grande pompe & liesse. Entre autres, le Sei-  
gneur de la Verdierë dit, qu'il vouloit pour  
l'amour des Dames, dresser l'escarmouche  
contre Monsieur de Mauuans: ce qu'il fit.  
Mais le seigneur de Mauuans entendant le  
bruit, môte à cheual, ensemble le seigneur  
du Bar & autres qui les suiuoyent, & vont  
trouuer lesdits assaillans, lesquels s'estre ren-  
contrez, se saluerent à coups de pistoleta-  
des. Mais la Verdierë recognoissant le Sei-  
gneur du Bar, commence à crier, au Bar, au  
Bar: toutesfois le Bar fut secondé par le Sei-  
gneur de Mauuans, & lors la Verdierë cou-  
rut sur Mauuans, & Mauuans le blece d'v-  
ne pistoletade, puis le Bar le poursuivant,  
de son coustelas le tue. Et voilà à quoy ont  
serui ces brauades à la Verdierë, qui voulut  
mourir pour l'amour des Dames. Cependât  
l'escarmouche duroit tousiours, & Mau-  
uans se retira blecé d'vne harquebouzade à  
vne iambe, & se fit porter à Cisteron, pour  
estre mieux en repos. L'endemain le Sei-  
gneur de Cardé, General du camp, conclut  
auec le Seigneur de Ponart & autres Capi-

taines, de donner la bataille. Parquoy ayans rangé les soldats & dressé les bataillons, ils font les prieres, & inuoquent Dieu qui leur donne victoire. Apres cela ils mettent deux compagnies en teste, pour faire la premiere escarmouche: assauior, la compagnie du Seigneur de Mallegeai, & la cōpagnie du Capitaine Siguiran: lesquelles firent si bien leur deuoir, qu'elles firēt quitter la premiere tranchee à l'ennemi. Toutesfois craignāt le Seigneur de Cardé, l'artillerie de l'ennemi, manda aux combatans, qu'ils se retirassent: ce qu'ils firent incontinent, plus par contrainte, que de leur gré & volonté propre, voyans que l'ennemi reculoit si fort, & auoit ia abandonné la premiere tranchee. L'endemain le Seigneur de Ponart voyant qu'on auoit failli de donner la bataille, il fut fâché, & s'excusa, disant, qu'il auoit receu lettres pour marcher vers le Dauphiné, ce qu'il fit. Parquoy voyans les autres de nostre camp qu'ils estoient demeurez en si petit nombre, ils conclurent de se retirer, mesmes ayans entendu que l'ennemi se fortifioit de gens, & de munition, iusques à faire par toutes les villes, & chasteaux, & villages de Prouence, assembler trois hommes pour feu, & deux en argent. D'autrepart, au camp de l'ennemi, on attendoit de iour

en iour, mille ou douze cens Italiens au secours. Parquoy les nostres se retirerent à Cisteron, & là il fut deliberé de soulager la ville de partie des soldats, & departir les compagnies. Et de fait, le Seigneur du Bar, & le seigneur de Mallegeai son frere, se departent avec trois compagnies de cauallerie, & toute l'infanterie (hors-mis ceux qu'ils laisserent pour garnison en la ville) pour aller trouuer le Baron des Adrets, & venir avec toutes les forces des vns & des autres vnies & ralliees ensemble battre l'ennemi. Or de ce temps le seigneur de Senas fut eleu Gouverneur de la ville de Cisteron, par le seigneur Comte de Tande, où il demoura, accompagné de Monsieur de Mauuans, qui estoit blecé en vne iambe, comme nous auons desia dit par ci deuant, où ils commencerent de tout leur pouuoir à fortifier, faire tranches, abbatre maisons, & autres empechemens. Le seigneur de Brac & le Capitaine Thollon, sergent Maior, ne s'espargnoient point à trauailler, & à faire trauailler les gens de la ville, soldats & autres, à faire couper arbres, & porter le bois dedans la ville, pour faire tranches & autres choses propres pour la defense & fortification de la ville. Du costé de l'ennemi, Flaccan, & le Capitaine la Forest, maistre

de l'artillerie, furent enuoyez à Marseille, pour emmener deux pieces de batterie. Et le mecredi 27. d'Aoust, l'ennemi vint avec grande furie, assieger la ville de Cisteron, & cōmença à faire vne trāchee bien profonde & bien large : laquelle il eut fait dās sept ou huit iours. Cependāt les nostres faisoient tousiours nouuelles saillies, tenans vn passage hors la ville: assauior, le pont de Buec, ou ils attēdoient le seigneur de Mombrun, qui deuoit entrer par là. Toutesfois voyans les nostres que Mombrū ne venoit point, ils se retirent dedans la ville. Or apres beaucoup de grādes & merueilleuses escarmouches, le mecredi venāt, 2. du mois de Septēbre, le seigneur de Suze, la Boret, & autres Capitaines du camp de l'ennemi, departent avec deux ou trois mille hōmes, & six cens cheuaux, pour aller contre le seigneur de Mombrun qui venoit au secours de la ville de Cisteron, accompagné de huit ou neuf cens hommes : & l'ayans rencontré à Araigne, qui est à trois petites lieuës de Cisteron, ils deffirent enuiron cent cinquante hommes des nostres, & mettent les autres en route, & Mombrū se retira au Chasteau de Vaupierre, avec deux pieces d'artillerie, qui furēt peu apres prinſes de l'ennemi, & lors la Boret demeura pour ostage, & plu-



ſieurs autres. Ceux qui ſe retirent au camp de l'ennemi, commencerent à laſcher force harquebouzade, en reſiouyſſance de la victoire, & crier par mocquerie, Va querir ton Mombrun. Le lendemain 4. de Septembre, l'ennemi fit les approches, avec les quatre pieces d'artillerie, mettant trois pieces de campagne d'un bout de leur tranchee, pour battre la ville à flanc. Par ce moyen la breche faite d'environ cent pas, nos gens ne ſe eſtonnerent de rien : mais venans à la breche, & combattans vaillamment l'eſpace d'une heure, ils ſouſtindrent le premier aſſaut, & pluſieurs autres apres. Durant ces aſſauts, il y en eut un qui auoit ia gagné la breche, qui fut bruſquemēt repouſſé par les noſtres. Le nombre des morts & des blecez eſtoit grand du coſté des fideles, tant à cauſe des pieces qui battoient à flanc, q̃ celles qui faiſoyent la batterie, qui emportoient d'un coup trois ou quatre hommes, ſur la breche, ſans les eſclats & les eſcailles qui tomboyēt dru comme greſle, ſur les perſonnes qui eſtoient dans la ville. Toutesfois nos ſoldats ſouſtenoyēt touſiours vaillamment les coups de l'ennemi, faiſant rāpar des corps morts. Semblablement du coſté de l'ennemi il y eut grand nombre de morts & de blecez: car noſtre harquebouzerie tiroit à plaiſir,



à trauers la troupe qui venoit à la breche, avec balles empoisonnees, tellement qu'il en reschappoit peu de ceux que la balle auoit atteint. Le soir venu, ceux de la ville font reparer la breche en diligence. Et on trouua morts quelques Capitaines des nostres, & le Capitaine Bras, maistre de camp, eut vne iambe rompue. Semblablement y eut grand nombre de soldats morts, ou blecez à la breche, pource qu'ils auoyent soustenu le grand & dernier assaut avec des pierres, n'ayans plus poudre ni munition de guerre. Ce que voyât le seigneur de Senas & Mauuans, & autres Capitaines, cōcluent de quitter la ville, & faire marcher les femmes & le bagage deuant, avec les blecez: ce qu'ils firēt (apres auoir fait leur priere à Dieu, conducteur de ceste troupe) & partirent enuiron onze heures de nuict, sans toutesfois aduertir les soldats qui estoient aux murailles & à la breche, de peur de mener trop grand bruit, & afin de ne donner aduis à l'ennemi, voyant abandonner la place: ce qui aduint plus par le conseil de Dieu, que par prudence humaine. Car ils ne laisserēt pas de commettre vn Capitaine qui aduertit les soldats qui estoient aux murailles apres leur departement, hors mis ceux qui estoient à la breche: tellement que ces pources gens traual-

lerent toute la nuit , pour remparer la breche, & le lendemain combatiſſent avec l'ennemi , ne ſachans rien du departement des autres, qui eſtoient deſia en chemin pour ſe ſauuer, femmes, enfans, malades & blecez, avec pleurs & crieries. Entre autres , vn pource homme ayant la iambe rompue d'vne canonade, ſe traina par les degrez iuſques à la rue , & là il prioit les autres de ne l'abandonner point. Pluſieurs autres blecez pleuroient , & crioyent qu'on les fortiſt de la ville. Il eſtoit preſque iour deuant que l'ennemi entraſt dedans. Car la main puiſſante de Dieu les auoit tellement bridez , qu'ils ne voulurent entrer, diſans la nuit que les noſtres ſortirent , que le ſecours de Mombrun eſtoit venu , ou que c'eſtoit quelque trahiſon : nonobſtant que les Papistes criaſſent de la muraille à l'ennemi qu'il entraſt , & l'affeuraſt du departement des autres , & meſmes ſonnas les cloches pour aſſurance. En fin, ils entrerent, partie par la breche, & partie par eſcallade , tuans & maſſacrâs tous ceux de la ville, tant hommes que femmes, tant Papistes qu'autres , & faiſans grandes extorſions & pilleries , dedans & dehors la ville, tellement qu'ils prindrent vn pource vieillard , qui fut trouué à la queuë des autres qui eſtoient eſchappez , & le ietterent

du pont dans la Durance, pource qu'il ne vouloit pas dire, Je croy en Dieu & en la vierge Marie. Mais ie laisse à parler de l'ennemi qui estoit dans Cisteron, tuant & butinant, & parleray de la troupe des fideles, qui estoit esparse çà & là par bois & montagnes, craignant la main de l'ennemi.

Le Seigneur de Senas & Mauuans avec la troupe, marcherent tout le iour cinquieme de Septembre, par les bois, & arriuerent sur les trois heures apres midi, à vn village, nommé Barles, & là demeurerent attendans toute la troupe: toutesfois l'ennemi donnant à la queue, en tua, & fit plusieurs prisonniers, & viola femmes & filles, & mesmes de celles qu'il trouuoit esgarees par les champs. Le soir venu, que le reste de la troupe fut recueillie, les nostres prennent le chemin de Serue, pour aller à Selonet, & de là à Hubaye, afin de passer la Durance au dessus de Tallard, & se ioindre avec la troupe, qui estoit à Gap. Toutesfois à Hubaye, ils entendirent que l'ennemi estoit aux embusches, non gueres loin de là, pour leur donner la trouffe, s'il eust peu. Parquoy ils reurent bride: toutesfois l'effroy des femmes enceintes fut pour lors si grand, qu'elles enfanterent de peur, & là se trouua vne poure damoiselle, qui apres auoir enfanté, ne

laisa pas de monter à cheual, & suiure la troupe qui vint à Lauzet: où ils enuoyent le Capitaine Viuan, avec quelques harquebouziers, pour gagner vn passage: toutesfois ils furēt empeschez par ceux de la ville, qui se mirent en armes, à l'instigation d'un sergent de nos compagnies, qui fit la trahison. De là ils viennent à Barcellone, & viennent coucher à saint Paul, où ils furent aduertis que l'ennemi estoit à Guiglestre. Parquoy passans à la Cauai, viennent à Prat-gellat, où ils reposerent trois ou quatre iours. Et de là vont à Briançon, & passent le Montginebre, & voulans passer la Durance au pont de Briançon, le Capitaine la Casette, qui estoit à Briançon, accompagné de cinq ou six cens hommes, les en garda, faisant rompre les ponts, & couper les passages, tellement que les pures fideles furent contrains, tant grands que petis, passer la Durance à pied, ou à cheual, ou à la nage: ce qui fut vne estrange & piteuse auéture, tant pour l'abondance, que pour la froideur des eaux. Avec ce que l'ennemi les escarmoucha bien vne lieüe pres de là, toutesfois les nostres ne laisserent de prendre le chemin de Grenoble, où ils entendirent que le seigneur de Vinai, accompagné de mille ou douze cens hommes, estoit par la campagne. Parquoy Mau-

uans fait passer ses gés par le pays de Trioules, pource que l'ennemi s'estoit faisi du passage pres de Corps . Et de là les nostres arriuent à la Mure, où ils furent aduertis par vn Ministre de l'Eglise de Lyon, appelé Ruffi, du bon vouloir de messieurs de la ville de Lyon, & s'ils se vouloyent retirer en garnison à ladicte ville. Ce que le seigneur de Senas, & le seigneur de Mauuans, & autres Capitaines & soldats luy accorderent fort volontiers. Parquoy ils prindrent à l'instant le chemin de Lyon, passans par Grenoble. Et voila le chemin que tint ceste petite troupe par l'espace de trente iours, cheminant tousiours par bois & môtagnes, ayant d'autre part l'ennemi en teste & à la queuë de iour & de nuict . Mais ce bon Dieu & Pere de misericorde, ne les a point abandonnez au besoin : ains a voulu preseruer ceste sè-  
mence de tous gouffres & dangers, la benissant & faisant multiplier, voire de telle sorte, que pour vn mort, il en a fait resusciter cent autres, tant luy est chere ceste troupe sacree, laquelle ie prieray le Seigneur vouloir tost remettre en ses maisons, par la grace & vertu de son Fils Iesus Christ, auquel soit honneur & gloire à iamais, Amen.

*MADAME FRANCOISE*  
*de Foix, Comtesse de Tande.*

Madame, il vous plaira quelquefois de vos yeux  
Regarder ce discours piteux & lamentable,  
Vous verrez vn' histoire estrange & pitoyable,  
Et qui ne fut iamais veüe de nos ayeuls.

Vous verrez vos enfans (race aimée des cieux)  
Soustenir vn combat & saint & equitable:  
Vous verrez la fureur cruelle & detestable,  
Du pere enuers le fils, du ieune enuers le vieux.

Mais pour cela ne soit vostre ame en rië troublee  
De voir vne fureur, vne haine redoublee,  
Vn combat, vn pillage, vn siege, vn partement:

Car la chose est ainsi du haut ciel terminee.  
Mais de voir tout cela en moins que d'une annee,  
Cela vous peut donner quelque esbahissement.